



Te Taukī Kaupapa Here ā-Motu mō te Rerenga Rauropi Taketake

He whakarāpopoto

Kia mōhio ai te hunga pānui

Kua mahia he huringa ki te Tauākī Kaupapahere ā-Motu mō te Kanorau Koiora Taketake 2023 e te Resource Management (Freshwater and Other Matters) Amendment Act 2024. Me pānui tēnei pepa mōhiohio i te taha o te Significant natural areas under the National Policy Statement for Indigenous Biodiversity information sheet i whakatakotoria ai ngā huringa nā te Ture Menemana.

He tirohanga whānui

Kua whakarite te Kāwanatanga i tētahi Taukī Kaupapa Here ā-Motu mō te Rerenga Rauropi Taketake hei āwhina i te whakahaumarū me te pupuri tonu i tō tātou rerenga rauropi motuhake.

Mai i te wā i mana ai te Ture Whakahaere Rawa Taiao 1991, ko tā ngā kaunihera he whakahaumarū i ngā wāhi rauhi kei reira e kitea ana he nui te rerenga rauropi taketake. Ko te uaua i ōna wā, he iti ngā kupu tohutohu e kōrero ana mō te whakatinanatanga o tēnei ture, ka mutu kāore i rite tonu te whakahāngai i te herenga. Hei urupare ki tērā, kua whakatauritea te herenga ki te tautuhi me te whakahaere i ēnei wāhi taiao matua ki raro i te [Taukī Kaupapa Here ā-Motu mō te Rerenga Rauropi Taketake](#) (NPSIB) huri noa i Aotearoa whānui.

Ko ngā rerekētanga ki ngā kaupupuri whenua kei te āhua tonu o tā tō kaunihera tautuhi me tāna whakahaere i ēnei wāhi taiao matua i ngā wā o mua.

Ki ētahi rohe, ka iti noa pea ngā rerekētanga, engari ki ētahi atu, ka nui ake pea ngā rerekētanga.

Ka whakahou ngā kaunihera i ā rātou mahere me ā rātou rautaki hei ngā tau e heke mai, e whakaurua mai ai ko ngā herenga hou. Ko ētahi o ngā rerekētanga ka pahawa i nāianei.

Mēnā kei te tono koe i tētahi whakaaetanga rawa taiao mō ētahi mahi hou, mō ētahi whakawhanaketanga rānei ka pā atu pea ki ngā tipu taketake me ngā kararehe taketake, ka nui ake pea ngā herenga me whakatutuki.

Kei te pai te haere tonu o ngā mahi o mua mēnā ka noho tonu te pānga o aua mahi ki te taumata ōrite, ā, kāore e nui ake te ngaro haere o ngā tipu taketake me ngā kararehe taketake i ngā wāhi taiao matua (SNA) i aua mahi.

Ngā kōrero matua mō te rerenga rauropi taketake

E motuhake ana tō tātou rerenga rauropi nā te noho taratahi o tō tātou whenua i ngā tini tau miriona kua pahure atu.

Ahakoia ngā mahi moroki a ngā tāngata whenua, ngā kaupuri whenua, ngā hāpori, ngā rōpū tūmataiti, te kāwanatanga ā-rohe me te kāwanatanga ā-motu, e tāmāte tonu ana ō tātou pūnaha hauropi taketake. Mai i te 2012 ki te 2018 tonu, he 12,869 heketā te whakaititanga o te wāhi o ngā tipu taketake.

He nui ake i te 3,200 o ā tātou momo taketake e tata korehāhā ana, e whakamōreatia ana rānei nā te tāmāte haere o te wāhi noho.

Ahakoia e whakahaerehia ana ētahi wāhi nui o te rerenga rauropi taketake e te Kāwanatanga i te mea he wāhanga o tētahi wāhi whāomoomo, he nui ngā pūnaha hauropi onge i ngā raorao kei runga i ngā whenua tūmataiti e tika ana kia whakahaumarutia.

He aha te rerenga rauropi taketake?

E kōrero ana te rerenga rauropi taketake mō ngā rauropi katoa e ora māori ana i Aotearoa, me ngā pūnaha hauropi e noho ai aua rauropi. Arā, ko ngā tipu taketake me ngā kararehe taketake ahakoia e noho ana i ngā ngahere maunga, i ngā puhi kei ngā raorao e haumanu ana, i te tāwhao taketake, i ngā whenua pātītī, i ngā pāmu, i ngā tāone nui rānei.

He aha te Taukī Kaupapa Here ā-Motu mō te Rerenga Rauropi Taketake (te NPSIB)?

Ko te NPSIB tētahi taukī kaupapa here ā-motu i raro i te RMA. E tohu ana tēnei i ngā kaunihera ki te whakarite i ētahi ara ōrite i ā rātou kaupapa here, ā rātou mahere, me ā rātou rautaki ki te pupuri tonu i te rerenga rauropi taketake. E hāngai ana tēnei ki ngā momo whenua katoa, ā, e whakatakotoria ana ki roto ko ētahi paearu hauropi ōrite e whakamahia ana e ngā kaunihera ki te tautuhi i te wāhi o ngā SNA. Ko te whāinga ko te whakapai ake i te whakahaumarutanga o ngā tipu taketake me ngā kararehe taketake, me te akiaki i ngā tāngata e hiahia ana ki te whakawhanake, ki te panoni rānei i tā rātou whakamahi i tō rātou whenua.

Ka whakahou ngā kaunihera i ā rātou kaupapa here, ā rātou mahere, me ā rātou rautaki hei ngā tau e tū mai nei kia hāngai ai ki ngā herenga o te NPSIB, nā tērā ka rerekē ētahi o ngā ture mahere o nāianei me ērā atu o ngā mahi a ngā kaunihera mō te rerenga rauropi taketake. Ka whakatinana ngā kaunihera i ētahi wāhanga o te NPSIB i nāianei, nā reira mō ngā tāngata e tono ana i tētahi whakaaetanga rawa taiao mō ētahi mahi hou, mō ētahi whakawhanaketanga rānei ka pā atu pea ki te rerenga rauropi, me whakatutuki pea rātou i ētahi atu herenga.

He aha te take e matea ana te rerenga rauropi taketake?

He mea motuhake tō tātou rerenga rauropi taketake. He wāhanga whakahirahira tō tēnei mea i roto i tō tātou tuakiri ā-motu – ko ngā kiwi, ngā kererū, ngā koru, me ngā ponga he tohu ā-motu. Ka tūhono te rerenga rauropi i a tātou ki te whenua, ki a tātou anō, kei roto rā ko ētahi āheinga runaruna, ka mutu he wāhanga tō tēnei mea i roto i ō tātou whenua ātaahua e hāpai ana i te mahi tāpoi. Kei roto hoki ko te tini o ngā ratonga pūnaha hauropi pērā i te wai māori, te whakamauru waipuke, te whakawhena whenua, te miti hauhā me te kai, e hoatu atu ana i ngā piriona tāra ki tō tātou pāpori.¹ Ahakoa tērā, e ongeonge haere ana te nui hoki o ā tātou tipu me ā tātou kararehe e kaingākauria ana e tātou, arā, ko ētahi kua tata korehāhā.

I nāia tonu nei, ko ngā pūnaha hauropi e whakawhirinaki nei tātou e pūwhenua ana i ētahi wāhi maha. Ko ngā kaiurungi o te tāmatetanga o te rerenga rauropi ko ngā kīrearea kokohu, te panoni i te whakamahinga whenua, te whakamahinga inati o ngā rawa taiao, te parahanga me te āhuarangi hurihuri.

Ki raro i te RMA, me tautuhi ngā kaunihera katoa i ngā wāhi kei reira e kitea ana he nui te rerenga rauropi taketake. Engari, he rerekē ngā paeuru kei tēnā, kei tēnā kaunihera huri noa i Aotearoa, mō tā rātou tautuhi i ēnei wāhi, ka mutu, he rerekē ā rātou tukanga mō te pupuri noa i aua wāhi. Nā tērā, kua puta mai te pōhēhē me te rangirua i ngā kaipupuri whenua e hiahia ana ki te whakatipu, ki te whakawhanake hoki i te whenua. Ka tohutohu te NPSIB i ngā kaunihera ki te whakarite i ētahi tukanga e mārama ana, e ōrite ana hoki i ā rātou kaupapa here, ā rātou mahere me ā rātou rautaki, mā tērā ka nui ake te whakamanawa me te mārama ki ngā kaipupuri whenua.

He hononga motuhake, he hononga e kore e motu ō ngā iwi, ngā hapū me ngā whānau ki te whenua me te taiao. Mō ngā tāngata whenua, tē taea te wewete te tuakiri, te hauora, te mātauranga me te ao Māori i te hauora o Papatūānuku, o Ranginui hoki. E tūhonotia ana te tangata ki te whenua e te whakapapa, kāore e tū motuhake tēnā i tēnā.

Tokomaha ngā kaipupuri whenua, ngā tāngata whenua, ngā hapori, ngā rōpū tūmataiti me ngā kaunihera e whakapau wā ana, e whakapau pūtea ana anō hoki ki te tiaki i ā tātou tipu me ā tātou kararehe. Me koke tātou i tēnei mahi pai mā te mātua whakarite i tētahi tukanga ōrite ki te pupuri tonu i te rerenga rauropi huri noa i te motu.

He tūranga whakahirahira tō tātou katoa ki te whakahaumarū, ki te pupuri tonu hoki i tō tātou rerenga rauropi.

Ka pēhea te mahi a te NPSIB

Ko te tino whāinga o te NPSIB ko te āwhina ki te pupuri tonu i te rerenga rauropi taketake huri noa i Aotearoa. Ka tutuki noa tēnei mā te here i ngā kaunihera ki te tautuhi i ngā wāhi kei reira e kitea ana he nui te rerenga rauropi taketake, i ngā SNA rānei, ki te whakahaere i ngā hua kino i runga i aua wāhi nā ngā whakawhanaketanga hou, nā ngā mahi huri rauna i aua wāhi anō.

¹ E ai ki te whakatau tata a ngā kairangahau i te tau 2012, he 57 piriona tāra te nui o te utanga o ngā ratonga pūnaha hauropi i runga i te whenua o Aotearoa ki te oranga o te tangata. Patterson M G, Cole A O. 2013. "Total economic value" of New Zealand's land-based ecosystems and their services. I roto i tā J R Dymond, ed. *Ecosystem services in New Zealand – conditions and trends*. Lincoln, New Zealand: Manaaki Whenua Press.

Ka tohua ngā SNA i runga i ngā whenua e hāpai ana i ētahi hapori nui, i ētahi momo rānei o ngā momo taketake, pērā i ngā ngahere taketake me ngā rohe pātītī. Ko tētahi o ngā herenga o te NPSIB ko te whakaōrite i ngā hātepe a ngā kaunihera, i a rātou e mahi ngātahi ana me ngā kaupupuri whenua, ki te tautuhi, ki te whakahaere hoki i ēnei wāhi.

Ko ētahi atu āhuatanga o te NPSIB: ko te mahi a ngā kaunihera ki te tāmata i ngā wāhi whakahirahira, i ngā āhuatanga rānei kua pūwhenua i te wā; ko te whakarite i ētahi rautaki rerenga rauropi ā-rohe ki te arataki i ngā mahi ki te taumata ā-rohe; ka mutu, ko te aroturuki i te āhuatanga me te whānuitanga o te rerenga rauropi kia mārama ai ki ngā rerekētanga e pahawa ana.

Ka pēhea tā te NPSIB whakatutuki i tēnei?

Ka whai māramatanga ngā kaunihera me ngā kaupupuri i roto i te NPSIB mā tā te NPSIB whakamārama atu ki ngā kaunihera me pēhea tā rātou whakatinana i ngā herenga RMA mā roto i ā rātou mahere, ā rātou taukī kaupapa here, me ā rātou whakataunga.

Ka whakatakoto te wāhanga 1 me te wāhanga 2 i te hōkaitanga, ngā aroro tūāpapa, ngā whakamāramatanga, ngā whāinga me ngā kaupapa here, ā, ka noho ērā hei anga mō te toenga o te puka.

Ka whakatakoto te wāhanga 3 i ngā herenga whakatinanatanga mō ngā kaunihera. Ka:

- whakatakoto i tētahi tukanga **ōrite** mō te tautuhi me te tiaki i ngā wāhi kei reira he nui te rerenga rauropi taketake. Ka here te NPSIB i ngā kaunihera ki te tautuhi i ngā SNA i ā rātou mahere mā te whakamahi i ētahi paearu hauropi ōrite. Mēnā e whakamaheretia ana tētahi mahi, tētahi whakawhanaketanga, tētahi whakamahinga rānei, ā, e tinga ana ka pā atu tērā ki tētahi SNA, me whakamahi ngā kaunihera i tētahi tukanga ōrite i ā rātou hātepe whakatau
- **whakahaumarū** i ā tātou momo taketake tongarewa rawa me ngā nōhanga o rātou mā te whakatakoto i ngā pānga hauropi me papare, mā te here hoki i ngā kaunihera ki te whakahaere i ngā hua kino o ngā mahi hou i runga i ngā SNA, ki ētahi atu rerenga rauropi taketake, ki ngā momo taonga anō
- whakaatu i ētahi atu **tukanga rerekē** mō ngā whakamahinga whenua rerekē me ngā momo whenua hoki, me ngā ahumahi me te tūāhanga e tika ana mō te oranga ā-pāpori, ā-pūtea, ā-ahurea anō. Arā, ko ngā ahumahi me ngā tūāhanga e hirahira ana ā-rohe nei, ā-motu nei hoki (pērā i te whakatipu whare); ko te ahuwahua, ko te whakatipu ngahere, ko te hauhake i ngā momo taketake tauhokohoko; e whakaaetia ana te whakamahinga tonutanga o ngā whakamahinga o nāianei (kei raro ngā taipitopito kōrero); ā, kei roto ko ētahi āheitanga mō te hauhake ngahere taketake mēnā he toitū te mahi, mō ngā kararehe e kaha ana ki te haere, mō ngā kawenata o te Queen Elizabeth II Trust (QEII), mō ngā SNA ngāwhā anō hoki
- hāpai i **ngā mātāpono o te Tiriti o Waitangi** mā te whakarato i ngā tukanga ngāwari me ngā tukanga i whakawhanakehia i ngā rohe, mō te whenua Māori. E mōhio ana te NPSIB ki ngā tauārai o mua i taupātia ai ngā tāngata whenua i a rātou e noho ana, e whakamahi ana, e whakawhanake ana i tō rātou whenua me te rahinga pāhikahika o te rerenga rauropi taketake i runga i taua whenua, ā, he nui ake i tēnā o ērā atu whenua. Kei roto i te NPSIB ko ētahi āheitanga ki te aro atu ki ngā hīraunga o ēnei rerekētanga i ngā wā o mua. Ka hiahia te NPSIB ki te whakapakari i te tūranga o **ngā tāngata whenua hei hoa kōtui** ki ngā kaunihera i te whakahaere i te rerenga rauropi taketake, me te mōhio ki te tūranga o ngā tāngata whenua hei kaitiaki
- nui ake te **ngākau titikaha** i ngā kaupupuri whenua ki te haere tonu i ngā mahi o nāianei mēnā kāore e puta mai he rerekētanga e tāmata ai, e pūwhenua ai rānei tētahi SNA. Ko ētahi o aua

mahi ko te pāmu kararehe me te mahi ngahere. Ki te hiahia tētahi kaupupuri whenua, tētahi kaiwhakawhanake whenua rānei, ki te whakatū i ētahi mahi hou, whakawhanaketanga hou rānei, ka whakatakoto te NPSIB i tētahi tukanga ōrite hei whakamahinga mā ngā kaunihera ki te arotake, ki te whakarite tikanga mō te whakahaeretanga i aua mahi hei ngā wā anamata. Ka mahi ngātahi ngā kaunihera me ngā kaupupuri whenua i te tīmatanga o te hātepe ki te tautuhi i ngā SNA me te mōhio hoki ki te tūranga o ngā kaupupuri whenua me ā rātou mahi hei kaitiaki mō te rerenga rauropi

- whakarato i ētahi atu **taputapu** e hāngai ana ki te rerenga rauropi, pērā i te whakatairanga i te tāmata o te rerenga rauropi, te whakanui ake i te horapa o ngā tipu taketake, te waihanga i ētahi rautaki rerenga rauropi ā-rohe me te aroturuki i te rerenga rauropi taketake.

Ka whakatakoto te wāhanga 4 i ngā herenga wā mō ngā āhuatanga o roto, me te whai i tētahi tukanga whai-wāhanga i te whakatinanatanga.

Ko ngā mahi kāore e kawea ana e te NPSIB

Ka tohutohu te NPSIB i ngā kaunihera, kua i ngā kaupupuri whenua. Kāore he herenga ki ngā kaupupuri whenua ki te whakahaere tōmua, ki te tāmata rānei i te rerenga rauropi taketake, ki te whakakore i ngā taru me ngā kīrearea, ki te tāepa rānei i ngā SNA.

E whakarato ana te NPSIB i te whakahaumarutanga mō tō tātou rerenga rauropi taketake whai hiranga. Kāore e pā atu ana ki te pupuri whenua, kāore hoki e kī ana ko ngā wāhi rerenga rauropi taketake katoa he SNA.

Ka taea tonuhia ngā mahi o nāianei te haere tonu mēnā kāore e puta mai he rerekētanga e ngaro ai, e pūwhenua ai rānei tētahi SNA, ka taea tonuhia hoki mēnā ka tū tonu ngā whakaaetanga o nāianei kua whakaaetia mō ngā rawa me ngā wawaetanga.

Ko te whāinga o te NPSIB ko te hoatu i tētahi tukanga ōrite, i tētahi tukanga mārama ki ngā kaunihera mō te tautuhi, te tāmata me te whakahaere i te rerenga rauropi taketake whai hiranga. **Ka taea tonuhia ngā whakahoutanga hou**, engari ka tohutohu te NPSIB i ngā kaunihera ki te here i ngā kaupupuri whenua me ngā kaiwhakawhanake e hiahia ana ki te tīmata i ētahi whakamahinga hou, whakawhanaketanga hou rānei, kia kore ai e pahawa, kia whakahaerehia ai hoki ko ngā hua kino ka puta mai i aua mahi ki te rerenga rauropi taketake i runga i te whenua.

Kāore e hāngai ana te NPSIB ki ngā huarawa me ngā mahi e waihanga ana i te hiko whakahou, kāore hoki e hāngai ana ki ngā rawa whatunga me ngā mahi mō te tuku hiko mēnā kāore aua mahi katoa i tautuhia he tūāhanga mō te take o te NPSIB.² E whakaritea ana ētahi atu tohutohu ā-motu mō ērā mahi.³ Kāore te NPSIB e hāngai ana ki ngā momo taketake me ngā pūnaha hauropi i ngā wāhi wai māori me ngā wāhi takutai. Arā ētahi atu tohutohu ā-motu mō tērā,⁴ ka whakakotahihia ki raro i te National Planning Framework⁵ e marohitia ana mō ngā tau e tū mai nei.

² Tirohia [te wāhanga 1.3\(3\)](#) – Application.

³ Kei te whakahouhia te National Policy Statements for Renewable Electricity Generation (NPSREG) me te Electricity Transmission (NPSET) me ngā National Environmental Standards on Electricity Transmission Activities, ā, e marohitia ana ka whakarato ēnei i tētahi ara whakaaetanga mō ngā whakawhanaketanga e pā kino atu ana ki ngā SNA.

⁴ Hei tauira, ko te National Policy Statement for Freshwater Management, te National Environmental Standards for Freshwater me te New Zealand Coastal Policy Statement.

⁵ Ko te National Planning Framework tētahi whakakotahitanga o ngā tohutohu ā-motu katoa, tae ana ki ngā taukī kaupapa here ā-motu, ngā paerewa taiao ā-motu, me ngā waeture ki roto i tētahi pūnaha kotahi. Ka tohutohu hoki i ngā rautaki whaitua ā-rohe, me ngā mahere mō ngā taiao ka waihangatia me ngā taiao māori.

Ka pēhea te rerenga rauropi whakahirahira kei waho i ngā SNA?

Ehara i te mea ko ngā SNA anake ngā wāhi matua mō te rerenga rauropi. Ka herea ngā kaunihera ki te tāmata i te rerenga rauropi taketake kei waho i ngā SNA mā te whakahaere i ngā hua kino ka puta mai i ngā mahi hou me ngā whakawhanaketanga hou i runga i te whenua. Engari, e ngāwari ana ngā herenga ki ngā kaunihera mō te whakatutuki i tēnei.

Mō ngā rohe kāore anō ngā kaunihera kia tautuhi SNA, mō te rerenga rauropi taketake anō kāore i roto i ngā SNA, ka whakahaerehia e te paparanga whakahaere hua ngā wawaetanga hou, ngā mahi hou, me ngā whakawhanaketanga hou e nui ana te pā atu ki te rerenga rauropi, ā, e tika ana kia tonoa tētahi whakaetanga rawa taiao.⁶

Me whaiwhakaaro hoki ngā kaunihera ki ētahi o ngā momo kararehe e kaha ana ki te hāereere (pērā i ngā pekapeka me ngā manu), mā te hoatu kōrero, mā te whakarite hoki i ngā wāhi ka haerehia e ēnei kararehe i ngā mahere ā-rohe. Mā tēnei ka nui ake ai te mōhiotanga ki ngā pānga i runga i ngā kararehe e kaha ana ki te hāereere ka tohua, ko ngā kararehe he uua te kitea, ka noho rānei ki te wāhi mō ētahi wāhanga anake o te tau.

He mea whakahirahira te tāmata i ngā pūnaha hauropi kua pūwhenua mō te pupuri tonu i te rerenga rauropi taketake o Aotearoa. Ko ētahi o ngā pūnaha hauropi kua nui rawa atu te ngarohanga me te patunga, ā, kotahi anake te ara e pupuritia ai ēnei pūnaha hauropi, arā, ko te tāmata me te whakahouhou. Ka here te NPSIB i ngā kaunihera ki te whakatairanga i te tāmata mō ētahi wāhi whakahirahira (hei taura, ko ngā SNA kua pūwhenua, ko ngā pūnaha hauropi onge me ngā pūnaha hauropi whakaraerae, ko ngā wāhi tauārai whakahirahira me ngā wāhi tūhono).

He kaitiaki ngā iwi, ngā hapū, me ngā Māori, he herenga ō rātou, he haepapa anō hoki ki ngā momo me ngā pūnaha hauropi e noho ana hei taonga ki a rātou. Ka whakatakoto te NPSIB i tētahi pou tarāwaho hei whakamahinga mā ngā kaunihera me ngā tāngata whenua i a rātou e mahi ngātahi ana ki te tautuhi i ngā taonga hauropi. Ka pērā mā te whakamahere, mā te whakamārama rānei i ngā taonga me ōna hua. Ka taea e rātou te mahi ngātahi ki te whakarite i tētahi pūnaha e tautoko ana i te tangata whenua ki te whakahaere taonga i runga i tōna ake mana.

Ka ahatia hei te wā ka tīmata te NPSIB?

He nui ngā kaunihera kua tautuhi kē, kua tīmata rānei i tētahi hātepe ki te tautuhi i ngā SNA. Ko ngā kaunihera kua tautuhi kē i ngā SNA ka arotake i aua wāhi kia hāngai ai ki ngā paearu NPSIB me ngā herenga.

Mō ngā kaunihera kāore anō kia tautuhi i ngā SNA i runga i ō rātou rohe, ka tīmata rātou i tēnei hei ngā tau e tū mai nei tae noa ki te 2028. Ko tētahi wāhanga o tēnei hātepe ko te mahi ngātahi a ngā kaimahi kaunihera me ngā kaipupuri whenua ki te kawē atu i ētahi arotakenga ā-whenua nei mō ētahi wāhi e whakaarohia ana he SNA.

⁶ Tirohia [te wāhanga 3.16 o te NPSIB](#) – Indigenous biodiversity outside SNAs.

Ko ētahi o ngā herenga NPSIB ka whai mana i tēnei wā tonu nei, tae ana ki te arotake i ngā pānga o ngā mahi hou me ngā whakawhanaketanga hou mā roto i te hātepe whakaaetanga rawa taiao. Ko ētahi atu herenga ka whakamanahia e ngā kaunihera hei ngā tau e waru ki te tekau e tū mai nei.

Ngā pātai me ngā whakautu

Ka ahatia mēnā ka tautuhitia tētahi SNA ki runga i tōku ake whenua?

He nui ngā kaunihera kua tautuhi kē i ētahi SNA, i ētahi atu momo wāhi ōrite, i ō rātou rohe. Mēnā kei runga tētahi SNA i tō whenua, kāore e kore kei te tiaki kē koe i taua wāhi. Mēnā kāore koe i te panoni i tō whakamahinga i te whenua, kāore hoki koe i te whakaaro ki te whakawhanake i te whenua, kāore he mahi māu. Kāore te NPSIB e here ana i a koe ki te kawē i tētahi atu mahi tōmua pērā i te tāepa, te patu kīrearea, tētahi atu mahi rānei.

Ka haere tonu ngā mahi me ngā anga o mua i runga i ngā SNA mēnā kāore aua mahi e whakanui ake i ngā hua kino ki runga i ngā SNA, ā, e whakatakotoria ana aua mahi i tētahi taukī kaupapa here, tētahi mahere rānei. Ko aua momo mahi ko te tautiaki, te whakahaere me te whakapai ake mēnā kāore ngā mahi nei e whakanui ake ā-whānui nei, ā-kaha nei, ā-āhuatanga nei, ā, kāore hoki ngā mahi e whakangaro, e whakapūwhenua rānei i tētahi SNA. Kāore te NPSIB e pā atu ki ngā mōtika whakamahinga o nāiane i raro i te wāhanga 10 me te wāhanga 20A o te RMA.

Kōrero atu ki tō kaunihera kia mōhio ai mēnā he kaupapa ā rātou kua whakaritea hei tautoko i ngā kaupupuri whenua, pērā i te whakakore reti me te pūtea tautoko i ngā utu whakahaere.

Me aha ahau mēnā kei te hiahia ki te whakawhanake i tētahi wāhanga o tōku whenua, ka mutu he SNA tōku?

Ki te whakarite koe i tētahi whakawhanaketanga ki runga i tō whenua e pāngia ai pea tētahi SNA, me kōrero atu ki tō kaunihera, ka mutu, tērā pea me tonu i tētahi whakaaetanga rawa taiao.

He ara whakaaetanga tohitū ō ētahi mahi, tae ana ki:

- te waihanga whare ki runga i tētahi tuwhanga o mua (mēnā i wawaetia i mua i te NPSIB, kāore hoki he whare). Ki te pērā, ka whakaae te NPSIB ki te waihanga whare, mēnā ka taea e koe te whakamauru ngā hua kino i runga i te SNA mā te whakamahi i te paparanga whakahaere hua, mā te ū hoki ki ērā atu ture kaunihera
- te waihanga me te whakapai ake i tētahi tūāhanga i tautuhitia mēnā ka tutuki ētahi whakamātautau
- ētahi mahi unu tae ana ki ngā hiatonga
- ngā mahi o te tāmata me te pupuri i tētahi SNA
- te whakamahi me te hauhake i ngā tipu taketake mēnā i whakatōkia mō taua mahi te take.

Mēnā kei raro te SNA i runga i tō whenua i tētahi kawenata (pērā i te QEII me Ngā Whenua Rāhui), ka tuku te NPSIB i ngā kaunihera ki te whakamahi i tētahi whakawāteatanga kōwhiritanga e wātea ai ngā mahi me ngā whakahaeretanga i roto i te kawenata.

He aha te tikanga o te papare i ngā hua kino?

Me pupuri tonu ētahi āhuetanga i ngā pūnaha hauropi e pai ai te tū tonu hei nōhanga mō ngā tipu taketake me ngā kararehe taketake. Ka whakatakoto te NPSIB i ētahi hua tohitū e rima me papare rawa nā runga i tā rātou pānga nui ki aua āhuetanga pūnaha haropi.

Ko ngā hua kino me papare rawa ko:

- (a) te ngaro o te āhuetanga pūnaha hauropi me te whānuitanga pūnaha hauropi
- (b) te whatinga o ngā raupapa, ngā rōpinepine, me te āheinga pūnaha hauropi
- (c) te nakunaku o ngā SNA, te ngaro rānei o ngā tauārai me ngā hononga i roto te SNA
- (d) te mimiti haere o te āheinga o te SNA hei tauārai, hei hononga rānei ki ētahi atu nōhanga whakahirahira, ki ētahi atu pūnaha hauropi hoki
- (e) te mimiti haere o te taupori, o te noho rānei a ngā momo whakaraerae, a ngā momo e noho mōrearea ana (e mimiti haere ana) e whakamahi ana i te SNA hei wāhanga o te hurihanga ora.

Ka noho ēnei hua e rima hei wāhanga i tētahi arotakenga ka whakamahia mō ētahi whakamahinga hou, whakawhanaketanga hou, mō ngā wawaetanga rānei e pāngia ai pea tētahi wāhi o te rerenga rauropi taketake i tētahi SNA. I te nuinga o te wā, me papare rawa ngā whakamahinga hou, ngā wawaetanga hou me ngā whakawhanaketanga hou i ēnei hua kino, ki te kore, e kore e haere tonu.

Mō ētahi atu hua kino, mō ngā wā anō e kotiti ai i te mahi kaupare i ngā hua kino tohitū e rima, mō te rerenga rauropi taketake hoki kei waho i ngā SNA, ka whakatū te NPSIB i tētahi paparanga whakahaere hua hei whakahaere i ngā pānga kino ka pā atu pea ki ngā SNA. He paparanga taumata ōna, he arapiki rānei, arā ko te karo, te whakaiti, te whakaora, te whakataurite, me te whakautu.

Te karo – koinei te whakaarotau matua mō ngā whakawhanaketanga hou, ngā wawaetanga hou, me ngā whakamahinga hou, arā, me karo e ēnei mahi ngā hua kino ki runga i ngā SNA, hei tauira, mā te whakaneke i te wāhi o tētahi whakawhanaketanga ki waho i te SNA.

Te whakaiti – mō ngā wā e kore e taea ngā hua te karo, me whakaiti rawa mēnā ka taea, hei tauira, mā te whakaneke i te wāhi o te awakari kia mimiti iho ai te pānga ki tētahi SNA.

Te whakaora – mēnā kāore e taea ngā hua katoa o tētahi mahi te karo, te whakaiti rānei, me whakatika ngā hua toenga, me whakaora, hei tauira, mā te whakatipu anō.

Te whakataurite – koinei hei kaupare i ngā pānga whakawhanaketanga, ngā pānga whakamahinga rānei e kore e taea te karo, ki runga i te rerenga rauropi taketake mā te whakahaumako i te rerenga rauropi taketake ki tētahi atu wāhi, mēnā kei roto tonu i te wāhi o te SNA ko te painga atu ko tērā. Ka whāia noatia tēnei ara mēnā kāore rawa e taea ngā taumata tōmua e toru te whai, ka mutu kei reira tonu ētahi hua kino e toe ana.

Te whakautu – koinei te hua kāore e paku hiahiatia ana, arā ka whakautua te ngaro o te rerenga rauropi ki runga i tētahi wāhi mā te āwhina i te rerenga rauropi ki tētahi atu wāhi.

Ki te kore e taea ngā hua kino katoa te whakamauru mā te whakamahi i tēnei paparanga, kāore e tika ana te mahi, ā, e kore e pahawa.

He aha te hātepe mō te whenua Māori?

Kei ngā whenua Māori i tautuhitia⁷ te nuinga o te rerenga rauropi taketake i Aotearoa nei. E 44 ōrau o te whenua Māori papatupu me te whenua herekore, e 36 ōrau o te whenua kokoraho Tiriti anō hoki e ūhia ana e te tipu taketake, hei whakataurite, e 7.5 ōrau anake o ērā atu whenua pīhi katoa. I ētahi wā, kua pēnei te pupuri nei nā ngā tauārai o mua ki te whakawhanake i te whenua.

E mōhio ana te NPSIB ki ngā taumahatanga o mua me te horapa o te rerenga rauropi taketake i te whenua Māori, ā, nā runga i te mōhio ki ēnei mea, kua whakaritea tētahi hātepe whakahaere e hāngai ana ki te Māori. Nā tēnei hātepe e herea ana ngā kaunihera ki te mahi ngātahi me ngā tāngata whenua me ngā kaupupuri o te whenua Māori i tautuhitia kia pahawa ai ko te whakawhanaketanga me te tiaki i te rerenga rauropi e haere ngātahi ana. He kōrero anō mō tēnei kei te [puka kōrero mā ngā tāngata whenua](#).

Ka puta mai he tautoko hei āwhina i ngā kaunihera, ngā tāngata whenua, me ngā kaupupuri whenua?

Ko te tautoko me te akiaki i ngā mahi rerenga rauropi ngākaupai he wāhanga matua i te urupare tonu ki te mimiti haere tonu o te rerenga rauropi taketake. Ko tētahi ara e tutuki ai tēnei ko te whakapai ake i te āheitanga atu ki ētahi kaupapa akiaki whai-pūtea, ki ētahi kaupapa akiaki kore-pūtea e tautoko ana i ngā kaupupuri, me te whakanui ake i aua momo kaupapa. Ka āhei pea koe ki ētahi tautoko kei tō kaunihera, pērā i te tohutohu hauropi, te pūtea, me te whakakore reti mō ngā whenua rauhī, engari ka rerekē pea ngā momo tautoko kei tēnā, kei tēnā rohe.

E tautoko ana te kāwanatanga ā-motu mā roto i ētahi tini pūtea tauwhawhai, i ētahi tini pūtea heipū e whakatairanga ake ana i te whakahaumarū, te pupuri tonu, me te tāmata i te rerenga rauropi. Ko ētahi atu tautoko nā te kāwanatanga ā-motu mō te rerenga rauropi taketake me te whakatinana pū i te NPSIB ka tukua atu ki ngā kaunihera, ngā tāngata whenua, me ngā kaupupuri whenua.

Kei te mahi te Manatū mō te Taiao me Te Papa Atawhai i ētahi kaupapa rangahau ki te whakatū i tētahi pūnaha nama rerenga rauropi mō Aotearoa nei. E puta mai ana ētahi hātepe nama rerenga rauropi i tāwāhi ki te whakapoapoa i te tautoko a te rāngai tūmataiti ki te rerenga rauropi. Ka tuwhera te uiuinga mō tēnei i waenga i te 7 o Hūrae me te 3 o Noema i te tau 2023.

Ko tētahi atu mahere whakatinana Māori, arā he mahere motuhake, e whakaritea ana i te mahi ngātahi me ngā hapū me ngā iwi, ka tautuhi i ētahi tautoko tohitū ki te tautoko i ngā tāngata whenua. Ka oti tēnei hei ngā marama whakamutunga o te tau 2023.

Hei āhea mana ai tēnei kaupapa here?

Hei te 4 o Ākuhata 2023 mana ai te NPSIB, ā, ka whakarerekē ngā kaunihera i ā rātou kaupapa here me ā rātou mahere hei ngā tau e heke mai kia hāngai ai ki ngā whakaritenga o te NPSIB. Heoi anō, hei taua wā tonu tīmata ai ngā kaunihera ki te whakatinana i ētahi wāhanga o te NPSIB, nā reira me ea ngā herenga o te NPSIB e ngā mahi hou me ngā whakawhanaketanga hou e pāngia kinotia ai pea te rerenga rauropi, ka mutu e matea ana te tonu atu i tētahi whakaaetanga rawa taiao – kei te tēpu 1 ngā taipitopito kōrero.

⁷ Ko te whenua Māori papatupu me te whenua herekore i raro i te Te Ture Whenua Māori 1993 me te whenua kokoraho Tiriti. Tirohia te wāhanga 1.6 i te NPSIB mō te whakamāramatanga tohitū.

Tēpu 1: Te wātaka whakatinana i te NPSIB

Te wā	
Te kaupapa matua o te Taukī Kaupapa Here ā-Motu	
Hūrae 2023	<ul style="list-style-type: none">Te kāhititanga o te Taukī Kaupapa Here ā-Motu mō te Rerenga Rauropi Taketake
Te putanga kaupapa here matua	
Ākuhata 2023	<ul style="list-style-type: none">Ka mana te Taukī Kaupapa Here ā-Motu mō te Rerenga Rauropi Taketake.Te whakatinanatanga o te Wāhanga 1 me te Wāhanga 2 (ngā whakaritenga hukihuki, ngā whāinga hukihuki me ngā kaupapa here hukihuki) me ētahi kaupapa here o te Wāhanga 3 (whakatinanatanga).
Waenganui 2026	<ul style="list-style-type: none">Mō ngā kaunihera ā-rohe kāore ā rātou rautaki rerenga rauropi ā-rohe, ka tīmata rātou ki te waihanga i tētahi rautaki i ngā tau e toru i muri i te tīmatanga o te NPSIB.
Waenganui 2027	<ul style="list-style-type: none">Ko ngā kaunihera kua tautuhi kē i ētahi SNA, ka whakamōhio atu rātou i pēhea te whakaea a taua mahi i ngā herenga o te NPSIB.
Waenganui 2028	<ul style="list-style-type: none">Kua tautuhi, kua whakamahere, kua pānui hoki ngā mana ā-rohe i ngā Wāhi Taiao Matua, ā, kua whakatinana i te Wāhanga Iti 2 o te Wāhanga 3.I ngā tau e rima, me mātua pānui ngā kaunihera i tētahi mahere, i tētahi taukī kaupapa here rānei e whakatinana ana i te Wāhanga Iti 2 o te Wāhanga 3, tae ana ki te tautuhi i ngā Wāhi Taiao Matua me te tautuhi i ngā ture mō te whakahaere i aua wāhi.
Waenganui 2031	<ul style="list-style-type: none">I te wā ka taea, i mua rānei i te whakamutunga o te 2031, kua pānui ngā kaunihera i ngā rerekētanga ki ā rātou taukī kaupapa here me ā rātou mahere hei whakatinana te NPSIB.
Waenganui 2033	<ul style="list-style-type: none">Mō ngā kaunihera ā-rohe kāore ā rātou rautaki rerenga rauropi ā-rohe, kua whakaoti rātou i tētahi rautaki.Mō ngā kaunihera ā-rohe, he rautaki rerenga rauropi ā-rohe ā rātou, kua whakahou rātou i taua rautaki.

Kei hea ētahi atu kōrero?

Kōrero atu ki tō kaunihera ā-rohe, tuku īmēra ki indigenusbiodiversity@mfe.govt.nz, toro atu rānei ki environment.govt.nz.

Arā hoki ētahi puka kōrero mā ngā [tāngata whenua](#), [ngā kaiahuwhenua me ngā kaiwhakatipu](#), [ngā kaitiaki ngahere me ngā kaiwhakahaere](#), [ngā kaiwhakarato tūāhanga me ngā kaiwhakawhanake tāone](#).

